

生也。六四太吝。君子吉。小人凶。象曰：吝於君子，雖有言，無尤也。吝於小人，雖不言，終有悔也。六五不吝於色，務所欲，終以死亡。凶。朋來，吝於酒食，弗克歡，無咎。象曰：不吝於色，惑於淫也。務所欲，樂其順從也。終以死亡，凶可知也。朋來，從其類也。吝於酒食，誠大謬也。雖弗克歡，而無咎也。上九居其家，不吝於內，吝於教子，弗叶吉。象曰：居其家，妄自尊也。不吝於內，畏寡妻也。吝於教子，終無所成也。近扶風馬文璧疏又作諛卦曰：諛，貞亨。初吉，終凶。利見小人，不利於君子。象曰：貞，正也。亨，通也。通乎正言，諛或庶幾也。終凶，諛不由初也。利見小人，猶同類也。不利於君子，入於邪也。象曰：麗口掉舌，諛君子以求名干祿也。初九諛于同朋，無咎。象曰：同朋于諛，又誰咎也。九二略施于民，吉。象曰：九二之吉，以新衆聽也。六三來其諛，酒食用享。象曰：來其諛，民取則也。享其酒食，以崇功也。九四飾言如簧，以娛彼心，用獲南金。象曰：娛人獲金，不足道也。九五君子終日高諛，王用徵，安車以迎。終歲弗寧，後有凶。象曰：以諛受徵，不羞也。終歲弗寧，祇足煩勞也。後有凶，不副實也。上六莽諛不已，四方欲殺之。象曰：莽諛衆怒，殺之何過也。右三卦切中時病，真得風刺之正，因併錄之。

烏涎戶

廣東采珠之人，懸絙于腰，沉入海中，良久得珠，撼其絙，舶上人挈出之，葬于鼉鼉蛟龍之腹者，比比有焉。有司名曰烏涎戶，涎音但。仁宗登極，特旨故免，時敬公戴卿爲江西行省參知政事，俾該管掾史立案，令廣東帥府抄具烏涎戶一一籍貫姓名，置册申解他省。官曰：中書咨文無是，恐不必也。公曰：萬一乃申明舊典，庶不害及良民，未幾，太后中使至，人咸服公先見之明。

重臺

凡婢役於婢者，俗謂之重臺。按左氏傳：昭公五年，日之數十，故有十時，亦當十位。自王以下，其二爲公，其三爲卿。注云：日中爲王，食時爲公，平旦爲卿。雞鳴爲士，夜半爲皂，人定爲輿，黃昏爲隸。日入爲僚，晡時爲僕，日昃爲臺，日中出闕不在第等。王公曠其位，又昭公七年，天有十日，人有十等，故王臣公，公臣大夫，大夫臣士，士臣阜，阜臣輿，輿臣臺，則所謂臺者，十等之至卑。今豈亦本是輿，然加以重字，尤有意。

日子

文選：曹公檄吳將校部曲文，年月朔日子。注：發檄時也。